

O fotógrafo Jose Romay vén de gañar o concurso de fotografía 'Imaxes con Fondo', promovido polo Fondo Galego de Cooperación e Solidariedade. Unha serie tirada nunha zona de invernadoiros onde traballan e viven inmigrantes en El Ejido (Almería) merecelle a este profesional, veciño de Meis, unha viaxe a Cabo Verde para realizar un traballo fotográfico sobre algún dos proxectos apoiados pola entidade organizadora. O mozo de 15 anos Xiao Aller, da Estrada, venceu na categoría xuvenil co retrato dun burro agredido. O premio é unha cámara réflex e un lote de produtos de comercio xusto.

O xurado estaba integrado polos fotoxornalistas Gabriel Tizón, Carlos Puga e Sonia Daponte, a escritora Rexina Vega; a presidenta da Coordinadora Galega de ONGD, Gema Filgueira; a presidenta do Fondo Galego, Teresa París, e mais unha representante do Concello de Oleiros, Marga Figueroa. Avaliouse non só o contido e a calidade das imaxes, senón tamén o 'tweet' que as acompañaba. "O primeiro mundo cérralle as portas ó terceiro agás para traballar nos sectores máis duros" era o lema das fotografías presentadas por Jose Romay baixo o título 'Os viaxeiros do Terceiro mundo'. Pola súa banda, o mozo Xiao Aller describía a serie chamada 'Chegando á casa. O ferido. A ferida' deste xeito: "A solidariedade non só se practica con persoas, senón tamén cos animais. Aquí pódese ver un burro ferido que atopamos en Santiago, levámolo para a casa e estámolo curando".

O 15 de novembro pechábase o prazo para concorrer ao concurso 'Imaxes con Fondo', que rexistrou un total de 7 participantes na categoría xuvenil e 40 na de persoas adultas. 'Cambia, reivindica e constrúe' era o tema deste apartado no que as propostas debían reflectir como determinadas accións das sociedades do Norte inciden negativamente sobre as poboacións do Sur. Na sección para mocidade de entre 13 e 17 anos, co encabezamento 'A solidariedade dá sentido ás nosas vidas', tratábase de amosar accións solidarias na nosa contorna.

A entrega de premios do concurso 'Imaxes con Fondo' terá lugar o vindeiro 30 de novembro no acto de conmemoración do 15º aniversario do Fondo Galego de Cooperación e Solidariedade, que se celebrará en Santiago de Compostela. A convocatoria do certame contou coa colaboración da Asociación Galega de Reporteiros Solidarios (Agareso), a Asociación Provincial de Fotógrafos Profesionais de Pontevedra, a Asociación Provincial de Fotógrafos Profesionais de Lugo, a Agrupación Fotográfica Galega e a Asociación Fotográfica Galega 'Phosgalicia'. A actividade encádrase no Plan de Sensibilización 2012, cofinanciado pola Xunta de Galicia.